

րիսս յառաջագոյն ամօրուակից և գործակից էր նմին յա-  
մենայն իրս, որպէս գրի 'ի յիշատակարանս մատենից :  
« Գրեցաւ յառաջնորդութեան Տէր Աստուածատուր և Տէր  
Անգրիսս Արքեպիսկոպոսաց՝ և շնորհալից Դաւթին : Եւ նոր  
նահատակացն Յովհաննէս Հայրապետի, Սարգիս Եպիսկո-  
պոսի և Դաւթի կրօնաւորի, որք նուիրակ առաքեցան յէջ-  
միածնէն և նահատակեցան 'ի կոստանդինուպօլիս գլխատ-  
մամբ սրոյ . ( 1508 ) : Սակայն տեսեալ միաբանաց և նմին  
խոյ Աստուածատրոյ զյաջողակութիւն 'ի գործս և ճար-  
տարութիւն 'ի բանս Անգրիսսայ, ընտրեցին զնա գլուխ և  
առաջնորդ ինքեանց, և ամենեքեան իջեալ 'ի դատարան,  
յայտ արարին առաջի դատաւորին և այլազգեաց զընտրու-  
թիւն միոյն և զհրաժարումն միւսոյն, և վկայեցին զԱնգ-  
րիսսէ թէ՛ է այր բարի և հաւատարիմ՝ յամենայն գործս  
իւր, և խնդրեցին հաստատել զպատրիարքութիւն նորին  
օրինօք դատարանի 'ի տեղի Աստուածատրոյ, և առին  
մուրհակ հրաժարման 'ի դատաւորէն ընդ արքունի հրամա-  
նի, և ապա սսեն՝ չունիմք ատելութիւն կամ հակառակու-  
թիւն զԱստուածատրոյ, նոյնպէս և սա՝ զԱնգրիսսէ : Յետ  
լսելոյ դատաւորին զբանս երկաքանչիւրոցն, հաստատեաց  
զՊատրիարքութիւնն 'ի վերայ Անգրիսսայ, 929 ( 1542 ) :

Դարձ արարեալ անտի նստուցին յամօրն զՏէր Անգ-  
րիսս, որ և հոչեցաւ Պարոն Տէր : Ի սմին ամի յորում  
նստաւ Անգրիսս յամօր Պատրիարքութեան, յարուցին  
վէճս Յոյնք յառուր ճրագալուցի Զատկի, զի մինչեւ ցայն  
վայր սովորութիւն լեալ էր 'ի մէջ ազգաց, յերեկոյին  
յայնմիկ 'ի կատարել զհանդէս Լուսաւորութեան, մտա-  
նէին 'ի Գերեզմանն Գրիստոսի . նախ տեսուչն Հապեջաց  
և ապա Պատրիարքունք Յունաց և Հայոց, և զինի նոցա  
տեսուչքն Վրաց եւ Գալթոց . այլ 'ի սմին ամի ընդդէմ  
կացին Յոյնք այսմ սովորութեան, զի կամէին նախ մը-  
տանել Պատրիարքին իւրեանց՝ և ապա այլոց . որոյ վասն  
եղեւ կռիւ և խռովութիւն 'ի նմին պահու . այլ 'ի վերայ  
հասեալ այլազգեաց հանդարտեցին զնոսս առ ժամն, եւ  
ետուն կատարել զհանդէսն ըստ առաջին սովորութեան .  
և զդատս իւրեանց վարել յատենի արքային : Զորմէ յե-  
տոյ . տաղտկացեալ Անգրիսսայ 'ի նեղութենէ այլազգեաց